

21. oktober 2007

UKA 2007/36

**Kulturikkut eriagisassat eqqissimatitaanerat pillugu Inatsisartut
inatsisissaattut siunnersuut**

pillugu

Inatsisartut Kultureqarnermut Ilinniartitaanermullu Ataatsimiititaliaata

ISUMALIUTISSIISUTAA

**Aalajangiiffigisassatut siunnersuutip aappassaaneerpeqarnerani
saqqummiunneqartoq**

Inatsisartut Kultureqarnermut Ilinniartitaanermullu Ataatsimiititaliaat
suliarinninnermini makkuninnga inuttaqarpoq:

Inatsisartunut ilaasortaq Kristian Jeremiassen, Atassut, siulittaasoq
Inatsisartunut ilaasortaq Ruth Heilmann, Siumut, siulittaasup tullia
Inatsisartunut ilaasortaq Doris Jakobsen, Siumut
Inatsisartunut ilaasortaq Juliane Henningsen , Inuit Ataqtigiit
Inatsisartunut ilaasortaq Lene Knüppel, Demokraatit

UKA 07-imi ulloq 3. oktober 2007-imi siullermeerinerup kingorna Inatsisartut
Kultureqarnermut Ilinniartitaanermullu Ataatsimiititaliaata inatsisissatut siunnersuut
misissorpaa.

Siunnersuutip imarisai

Kulturikkut eriagisassat tigussaasut pillugit inatsisip nutarterneqarnissaa
inatsisissatut siunnersuutikkut siunertarinearpoq, taamaalilluni kulturikkut
eriagisassat tammatsaaliorneqarnissaasa qanganitsallu eriagisassat pillugit
ilisimasanik katersinissap qulakkeerneqarnissaata sallutinneqarnissaat ilutigitillugu
assaanissamut sanaartornissanullu periarfissiisoqassalluni.

Tusarniaaneq

Siunnersuut piffissami 23. november 2006-imit 2. januar 2007-imut
tusarniaassutigineqarpoq, tamanna juullimut ukiortaamullu atatillugu inuppassuit
feeriarernerat eqqarsaatigalugu sivikinnerpaamik piffissaliinertut

isigineqarsinnaalluni. Tusarniaanermi akissutit kalaallisut danskisullu nuutinneri ataatsimiititaliamit tiguneqarput.

Tusarniaanermi akissutini arlalinni makku annermik sammineqarsimasut ataatsimiititaliap maluginiarpa:

- Pingaartumik sanaartortitsisunut namminersortunut inatsisissatut siunnersuutip aningaasaqarnikkut kingunerisassai.
- Qanganisarsiornikkut misissuinerit naammassineqarnissaannut qaammatinik 18-it periarfissaqartitsilluni killiliisimaneq.

Tusarniaanermi akissutit tunngavigalugit ataatsimiititaliap Ilaqutariinnermut, Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisumut arlalinnik apeqquteqarpoq, taakkunungalu akissutit ataatsimiititaliamit tiguneqarput (ilanngussaq 1 aamma 2).

Ataatsimiititaliap siunnersuummut oqaaseqaatai

Suliassaqarfimmi inatsimmik atuuttumik nutarterinissamik siunertaq inatsisissatut siunnersuusiornermi aallaavigineqartoq Inatsisartuni partiinit tamanit taparserneqarmat Kultureqarnermut Ilinniartitaanermullu Ataatsimiititaliap nuannaarutigaa. Kulturikkut eriagisassaatsinnik tammatsaaliuinissarput illersuinissarpullu ataatsimiititaliamit assut pingaartinneqarpoq, minnerunngitsumik siunissami kinguaassagut eqqarsaatigalugit.

Aammattaaq Nunatta Katersugaasiviata suliassaqarfimmi suliatigut immikkut ilisimasaqartutut inassisimanissaa aammalu Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaqfiup naammagittaalliuuteqartarfittut atuunissaa inatsisissatut siunnersuutikkut aalajangersarneqarmat ataatsimiititaliamit pitsaasutut isigineqarpoq. Maltamik isumaqatigiisummik akuersisinnaanitsinnik inatsisissatut siunnersuut kinguneqassaaq, tamannalu Kalaallit Nunaannut immikkut iluaqutissarsiffiusussatut ataatsimiititaliamit isigineqarpoq. Piffissami suliassaqaqfiit amerlanerujartuinnartut nunat tamalaat akornanni atuuttussanik aalajangersaavigineqarfianni nunarsuarmioqataavugut, tassungalu ilaavoq inatsisiliorneq.

Aningaasanik amerlanerusunik atugassiisoqanngippat inatsisissatut siunnersuummi anguniakkatut aalajangersakkat eqquutsinneqarsinnaanngitsut Nunatsinni Katersugaasiviit Kattuffiat Nunattalu Katersugaasivia tusarniaanermut akissumminni tikkuaraat ataatsimiititaliap maluginiarpa. Aningaasaqarnikkut kingunerisassat tamakkiisumik nassuiaavigineqanngitsut tusarniaanermut akissutini arlalinni tikkuarneqarpoq.

Taamaattumik inatsisissatut siunnersuummut nassuiaatini aningaasaqarnikkut kingunerisassat Naalackersuisut erseqqissumik nassuiaatiginngimmatigit ataatsimiititaliap ajuusaarutigaa. Inatsisissatut siunnersuummi ingerlatassat aningaasalersorneqarnissaannut immikkut atugassiissutigineqartussat kontomi pingaarnermi 40.14.11-mi, Nunatta Katersugaasivianut Allagaateqarfianullu

tunggasumi, aningaasanik immikkoortitsisoqartoq Naalackersuisut paasissutissiippu, naatsorsuinerimili tunggavik nassuiaatiginagu.

Kiisalu inatsisissatut siunnersuut inuussutissarsiornermik ingerlataqartunut aningaasaqarnikkut annertunerusumik kinguneqassannginnerarlugu Naalackersuisut naliliinerat atatsimiititaliamit isumaqatigineqanngilaq. Ukiuni makkunani aatsaat taamak annertutigisumik nunatsinni sanaartortoqarpoq, inuussutissarsiornermillu ingerlatsisunut namminersortunut sinaakktussat pitsaanerpaat sanarfineqassasut Naalackersuisut namminneq ersarissumik oqariartuutigaat. Tamanna tunggavigalugu inuussutissarsiornermik ingerlataqartunik tapersersuinissamik Naalackersuisut ersarissumik oqariartuutaata aammalu qanganisarsiornikkut misissuinernik qaammatit 18-it angullugit sivilissuseqarsinnaasunik sanaartortitsisut namminersortut namminneq akiliisarnissaannik inatsisissatut siunnersuummi piimasaqaatip akornanni imminut ataqatigiinngittoqartoq ataatsimiititaliaq isumaqarpoq.

Tassunga atatillugu uparuaatit siuliani taaneqartut siunnersuutip Inatsisartut ataatsimiittarfianni siullermeerneqarnerani Ilaqutariinnermut, Kultureqarnermut, Ilinniartitaanermut, Iisimatusarnermut Ilageeqarnermullu Naalackersuisumit taperserneqartut ataatsimiititaliap maluginiarpaa. Qanganisarsiornikkut misissuinerit ingerlanneqarnissaannut qaammatinik 18-inik § 10, imm. 2-mi killiliineq sivilissunerpaaffissatut aalajangersarneqartoq aammalu nunatsinni silap pissusaa eqqarsaatigalugu taamak killiliisoqartoq Naalackersuisunut ilaasortap pingaarnertut erseqqissarpaa. Misissuineq qaammatinik 18-inik pinngitsoorani sivilissuseqartariaqanngilaq, Nunattali Katersugaasivia inatsisissatut siunnersuutikkut taamak periarfissinneqarpoq.

Naalackersuisunut ilaasortap oqaaseqaatai **ataatsimiititaliami amerlanerussuteqartut Siumumeersut, Atassummeersut Inuit Ataqtigiinneersullu** tusaatissatut tiguaat.

Sanaartortitsisut eqqarsaatigalugit piffissaliunneqartup qaammatinit 18-iniit qaammatinut 12-inut sivilillineqarnissaa **ikinnerussuteqartut Demokraatit** kissaatigigaluarpaa.

Sanaartortitsisut qanganisarsiornikkut misissuinernik namminneq akiliisarnissaasa inatsisissatut siunnersuummi maanna allanneqarsimanera eqqarsaatigalugu assaanernik annikinnernik aningaasalersuinissamut aningaasalersueqataanissamulluunniit aningaasanut inatsimmi aningaasanik immikkoortitsisoqartoq Naalackersuisunut ilaasortap tikkuarpaa. Aammattaaq qanganisarsiornikkut misissuinerit aningaasartuutit kikkunnit akilerneqartarnissaat pillugu apeqqummik erseqqissaaneq pineqartoq Naalackersuisunut ilaasortap erseqqissaatigaa. Naalackersuisunut ilaasortap isumaa malillugu annertunerusumik sanaartortoq aamma tassaasariaqarpoq qanganisarsiornikkut misissuinerit aningaasartuutinik aamma akiliisussaq.

Ataatsimiititaliap isumaqatigiittup Naalackersuisunut ilaasortaq tamatumani isumaqatiginngilaa isumaqarlunilu qanganisarsiornikkut misissuinerit tamaasa

aallaavittut isigalugu Landskarsimit akilerneqartariaqartut. Eriagisassanik tammatsaaliuineq qanganisarsiornikkullu misissuinerit nunatsinni maanna siunissamilu innuttaasunit tamanit attuumassuteqarfigineqarlutik nunatsinni inuiaat ataatsimut susassaqarfigimmatigit ataatsimiititaliap tamatumani tunngavilersuutigaa, taamaattumillu taakku aamma Landskarsimit aningaasalersorneqartariaqartutut isigalugit. Kommunilli sanaartortitsisullu namminersortut qanganisarsiornikkut misissuinerit namminneq aningaasalersuerusuttut taamaaliornissaminut periarfissinneqarnissaat ataatsimiititaliamit ammaffigineqarpoq.

Taamaattumillu aallaavittut isigalugu qanganisarsiornikkut misissuinerit tamanik Landskarsip aningaasalersuisarnissaanik tamatumalu peqatigisaanik kommunit sanaartortitsisullu namminersortut tamanna pitsaaqutissaqartutut isigigunikkut qanganisarsiornikkut misissuinerit namminneq aningaasalersuisinnaanerat ilanngullugu imaqartumik allannguutissatut siunnersuummik Naalakkersuisut saqqummiusseqqullugit **ataatsimiititaliamit isumaqatigiittumit** kaammattorneqarput.

Ataatsimiititaliap inassuteqaatai

Siuliani allassimasunik oqaaseqarluni ataatsimiititaliap kaammattuutaanut naapertuuttumik Naalakkersuisut allannguutissatut siunnersuummik saqqummiussereerpata siunnersuut iluserilikkamisut iluseqartoq akuersissutigineqassasoq **ataatsimiititaliap isumaqatigiittup** inassutigaa.

Taama oqaaseqarluni Inatsisartut Kultureqarnermut Ilinniartitaanermullu Ataatsimiititaliaata siunnersuut aappassaaniigassanngortippaa.

Kristian Jeremiassen
Siulittaasoq

Ruth Heilmann
Siulittaasup tullia

Doris Jakobsen

Juliane Henningsen

Lene Knüppel